

四庫全書

史部

欽定四庫全書

史部
禮部志稿卷六十三

詳校官監察御史臣龔駱文

編修臣程嘉謨覆勘

總校官知縣臣楊懋珩

校對官中書臣黃秉元

謄錄監生臣祁有恭

欽定四庫全書

禮部志稿卷六十三

明
俞汝楫 編

冕服備考

乘輿以下冠服

考古定冠服制

洪武元年十一月甲子詔定乘輿以下冠服之制先是
上即位之初權宜創置服御之制未遑詳定至是命禮

官及諸儒臣稽考古制以聞禮部及翰林院等官議曰
乘輿冠服黃帝始作冕服有虞制十二章周制王有五
冕六服祭昊天上帝則服大裘冕祀五帝亦如之享先
王則服衮冕享先公饗射鷺冕四望山川毳冕社稷五
祀絺冕羣小祀玄冕凡兵事韋弁服眡朝皮弁服甸冠
弁服凶事弁服弔事弁經服燕居玄端漢高祖始制長
冠以入宗廟後漢明帝初服旒冕備文十二章晉祀天
明堂以大冕祀太廟朝會以法冕小會及臨軒以絺冕

征獵以繡冕耕藉饗國子以紘冕聽政以通天冠齊郊
廟以平天冠服臨朝以通天冠絳紗袍隋祭天地明堂
服衮冕朝日夕月宗廟社稷朝會皆服之朔日受朝及
大會諸祭祀還則服通天冠服唐制天子之服十有四
等祀天地服大裘冕踐祚享廟征還遣將飲至加元服
納后元日受朝賀臨軒冊拜王公服衮冕冬至受朝賀
祭還宴羣臣養老服通天冠其鷩冕毳冕玄冕緇布冠
武弁服黑介幘白紗幘平巾幘白袷各因事而祭之宋

祀天服大袞冕祭宗廟元日受朝賀及冊拜服袞冕宴會及冬至受朝賀服通天冠常服朝衫袍視事窄袍元祀天服大裘加袞祀宗廟服袞冕大朝以本俗衣冠今擬祀天地宗廟及正旦冬至聖節朝會冊拜皆服袞服玄衣纁裳其製冕版廣一尺二寸長二尺四寸冠上有覆玄表朱裏前後各十二旒每旒五采玉珠十二黹纁充耳玉簪導朱纓圭長一尺二寸衣六章畫日月星辰山龍華蟲裳六章繡宗彝藻火粉米黼黻中單以素紗

為之紅羅蔽膝上廣一尺下廣二尺長三尺繡龍火山
三章革帶佩玉長三尺三寸大帶素表朱裏兩邊用綠
上以朱錦下以綠錦大綬六綵用黃白赤玄縹綠純玄
質五百首小綬三色同大綬間施三玉環朱鞵赤舄其
郊廟省牲皇太子諸王冠婚禮醮戒之類則服通天冠
絳紗袍冠加金博山附蟬十二首施珠翠黑介幘組纓
玉簪導絳紗袍深衣製白紗內單皂領標襪裾絳紗蔽
膝白假帶方心曲領白鞵赤舄其革帶佩綬與袞服同

朔望視朝降詔降香進表四夷朝貢朝覲則服皮弁其製用烏紗冒之前後各十二縫縫中綴五采玉十二為飾玉簪導紅組纓其服絳紗衣蔽膝隨衣色白玉佩革帶玉鈎鐙緋白大帶白鞵黑舄其常服則烏紗折角向上巾盤領窄袖袍束帶間用金玉琥珀透犀

皇后冠服周制追師掌王后之首服為副編次追衡笄鄭玄云副者覆也覆首為飾若今步搖也編者編髮為之若今假紒也次者次第髮長短而為之所謂髮髻也

追治也衡筭皆以玉為之衡垂於副之兩旁當耳其下以紬懸瑱笄卷髮者內司服掌王后之六服褱衣揄翟闕翟鞠衣展衣緣衣三禮圖云褱衣色玄刻繒為翟形以五采畫之綴於衣以為文章揄翟青衣刻繒為搖雉畫以五色闕翟色赤刻翟形而不畫三者皆王后助祭之服也鞠衣色黃如鞠塵王后親蠶之服也展衣色白展與亶誠也王后以禮王及賓客之服也緣衣色黑王后接御於王之服也漢皇后首飾用假結步搖簪珥步

搖以黃金為山題貫白珠為桂枝相繆一爵九華熊虎
赤翟天祿辟邪南山豐大特六獸諸爵獸皆用翡翠
為毛羽金題白珠璫繞以翡翠為花入廟所用服紺上
皂下朝會用蠶服青上縹下隋皇后首飾用大小十二
樹褱衣鞠衣青衣朱衣四等褱衣深青色織成領袖文
以翠翟五采重行十二等素紗中單黼領羅縠褱襖色
皆以紅蔽膝隨裳色以緌為緣用翟三章大帶隨衣色
飾以朱綠之錦青緣革帶白玉佩玄組綬青襪舄舄加

金飾助祭及朝會受冊大事則服之鞠衣黃羅為質織成領袖蔽膝革帶及舄隨衣色餘同禕衣親蠶則服之青衣去大帶及佩綬金飾履見天子則服之朱衣如青衣唐皇后首飾用大小花各十二樹服禕衣鞠衣鈿釵禮衣三等禕衣深青色畫翟赤質五色十二等素紗中單黼領朱羅縠標襪蔽膝隨裳色以緞為領緣為翟章三等青衣革帶大帶隨衣色朱裏紕其外上以朱錦及懸以白玉雙佩黑組大綬青舄舄加金飾朝會受冊及

助祭則服之鞠衣黃羅為之蔽膝大帶革帶舄隨衣色
親蠶則服之鈿釵禮衣十二鈿兼用雜色宴見賓客則
服之龍鳳珠翠冠泥金衣霞佩常服之宋皇后首飾用
大小花各十二樹兩博鬢冠飾以九龍四鳳其服褱衣
深青織成翟文素質五色十二等青紗中單餘同唐制
朝會受冊助祭則服之鞠衣色黃蔽膝革帶舄則隨衣
色親蠶則服之其常服真紅大袖紅羅生色為領紅羅
長裙紅霞帔藥王為墜紅羅背子黃紗衫子白紗襦褲

明黃裙粉紅紗短衫今擬皇后首飾冠為圓匡冒以翡翠上飾九龍四鳳大花十二樹小花如之兩博鬢十二鈿服褱衣深青為質畫翟赤質五色十二等素紗中單黼領朱羅縠標襪裙蔽膝隨衣色以縵為領緣用翟為章三等大帶隨衣色朱裏紕其外上以朱錦下以綠錦紐約用青組玉革帶青襪舄舄以金飾凡朝會受冊謁廟皆服之燕居則服雙鳳翼龍冠首飾釧鐲以金珠寶翡翠隨用諸色團衫金繡龍鳳文帶用金玉

皇太子冠服周禮有王世子服而不載其制漢制皇太子服玄冠絳衣魏服五時朝服晉服遠遊冠介幘翠綴以白珠佩瑜玉垂組朱衣絳紗褙皂緣白紗中單白曲領帶領火珠素首革帶玉鈎鐔獸頭鞶囊至明帝泰始六年始服衮冕九章朝賀梁助祭則服衮冕九章朝會則朱衣絳紗袍隋皇太子從皇帝祭祀謁廟加元服納妃則服衮服謁廟還宮元日朔日入朝釋奠則服遠遊冠絳紗袍五日常朝則服常服唐制皇太子之服有六衮

冕者從祀謁廟加元服納妃之服也遠遊冠者謁廟還
宮元日朔日入朝釋奠五日常朝元日冬至受朝之服
也烏紗帽者視事及燕見賓客之服也弁冕者朔望視
事之服也平巾幘者乘馬之服也進德冠者亦乘馬之
服也宋皇太子從皇帝祭天地宗廟服袞冕九章其朝
會服遠遊冠服其常服皂紗折上巾其執圭之制至道
二年冊皇太子禮官上言周禮云天子執鎮圭公執桓
圭無太子執圭之文晉書太子出會在三恪之下三公

之上請皇太子執桓圭以受冊從之今擬皇太子從皇帝祭天地宗廟社稷受冊正旦冬至聖節朝會賀加元服納妃被袞冕九章其制冕九旒每旒九玉紅組纓金簪導兩玉鎮圭長九寸五分袞服玄衣五章畫山龍華蟲火宗彝繡裳四章繡藻粉米黼黻白紗中單黼領蔽膝隨裳色繡火山二章革帶金鈎鐔綬五采赤白玄纁綠純赤質三百二十首小綬三色大綬間施二玉環大帶白表朱裏上緣以紅下緣以綠白鞢赤舄其從皇帝

郊廟省牲及冊封公主則服遠遊冠絳紗袍其制金博
山附蟬施青翠黑介幘犀簪道絳紗袍白紗中單黑領
標襪裙衣裳白裙襦白假帶方心曲領紅紗蔽膝白韞
黑舄其朔望朝四夷朝貢朝覲則服皮弁其常服則烏
紗折上巾

諸王冠服周制王子封建為諸侯其服隨封爵漢封諸
子為王用遠遊冠上衣下裳玉佩鈎履唐親王服遠遊
冠黑介幘三梁青綬金鈎躡大帶金寶飾玉標首纁朱

綬朱質赤黃縹紺為純二百四十首黃金璫附蟬絳紗
單衣白紗內單皂領緣皂標襪革帶鈎釧假帶曲領方
心絳紗蔽膝白襪烏皮舄宋親王服七梁冠用金塗銀
稜貂蟬籠巾犀簪導銀立華朱裳白羅中單並皂標襪
蔽膝隨裳色方心曲領緋白羅大帶玉佩翬銀綬青絲
網間施三玉環白鞵黑履革帶以金銀鍍玉佩今擬諸
王受冊助受謁廟元旦冬至聖節朝賀加元服納妃服
袞冕九章冕用五采玉珠九旒紅組纓青纁充耳金簪

導圭長九寸二分五釐袞服青衣五章畫龍山華蟲火
宗彝纁裳四章繡藻粉米黼黻白紗中單黼領青緣黻
膝纁色繡火山二章革帶金鈎鑠玉佩受五采赤白玄
縹綠純青質三百二十首小綬三色同大綬間施三玉
環大帶表裡白羅朱緣白鞵朱履其朔望朝進表四夷
朝貢朝覲則服皮弁

皇妃冠服古者王后之下為夫人次嬪次世婦次御女
則夫人即皇妃之位也周制內司服掌六服褱衣揄翟

闕翟之下嬪服鞠衣世婦服展衣女御服祿衣鄭玄以
為九嬪服鞠衣則夫人服闕翟乎闕翟者王后第三等
服也玄以九嬪服鞠衣故以類推而以夫人服闕翟周
制無明文可見漢貴人首飾皆大首髻黑玳瑁加簪珥
妃以上又得服錦綺羅繒采十二色重緣袍唐首飾兩
博鬢飾以寶鈿花釵九樹翟衣九等青質繡翟編次於
衣及裳重為九等青紗中單黼領朱縠標襪裾蔽膝隨
裳色青衣革帶青鞵舄佩綬宋首飾大小花各九珠兩

博鬢冠飾以九翬四鳳褕翟青羅繡為搖雉之形編次於衣青質五色九等素紗中單黼領羅縠標襪裾蔽膝隨裳色褕翟為章二等以緞為領緣大帶隨衣色朱裏紕其外上以朱錦下以綠錦紐約用青組青衣革帶白玉雙佩黑組雙大綬小綬三間施三玉環青鞵舄舄加金飾今擬皇妃九翬四鳳冠大花釵九樹小花如大花之數兩博鬢九鈿翟衣青質繡翟編次於衣及裳重為九等青紗中單黼領朱綬標襪裾蔽膝如裳色加文繡

重雉為章二等以緹為領緣大帶隨衣色玉革帶青鞵
烏佩綬凡受冊助祭朝會諸大事則服之其燕居則服
鸞鳳冠首飾釧鐲用金玉珠寶翠諸色團衫金繡鸞鳳
不用黃束帶用金玉犀

皇太子妃王妃冠服凡受冊助祭朝會諸大事與皇妃
同惟王妃以素紗中單為別其燕居則服犀冠刻以花
鳳餘與皇妃同皆參酌唐宋之制而定之

袞冕

洪武元年十月翰林院學士陶安等奏古者天子五冕祭天地宗廟社稷諸神各有所用請製之上曰五冕禮太繁今祭天地宗廟則服袞冕社稷等祀則服通天冠絳紗袍不用十一月詔定乘輿以下冠服之制凡祭天地宗廟及正旦冬至聖節則服冕祭社稷先農冊拜亦如之

嘉靖八年五月上疑袞冕未合典制諭大學士張璁以制有革帶之文今何不見於用璁對曰按陳祥道禮書

古革帶大帶皆謂鞶革帶以繫佩韍然後加以大帶而笏搢於二帶之間夫革帶前繫韍後繫綬左右繫佩自古冕弁未嘗不用之今不用革帶前後佩服皆無所繫遂附屬裳要之間失古禮制矣上曰禮服不備非齊明盛服之意會典載蔽膝用羅上織火山龍三章并大帶緣用錦皆與今不合且衣裳分上下而今衣掩裳裳制如帷幔而今兩幅朕意衣但當與裳要下齊而露裳之六章何如已又諭璫以更祖制為疑璫對曰臣考禮制

衣不掩裳與聖意合夫衣六章裳六章上下適均自不容掩考之集禮會典與古不異今衣八章裳四章衣常掩裳國朝典籍皆無所見內閣圖註蓋因官司織造循習訛謬今訂正之乃為復祖上意決因復諭璉曰茲求至當一一與卿訂定衣六章古曰繪者畫也今當織之查國初冕服日月各徑五寸今當從之日月在兩肩星山在後華蟲在兩袖仍玄色裳六章古曰繡今從之古色用玄黃蓋取象天地今裳用纁義無取其從古其六

章作四行以火宗彝虎藻為二行米黼黻為二行革帶
即束帶後當用玉以佩綬繫之蔽膝隨裳色其繡上龍
一下火三不用山卿其詳議璉以聖裁至當為對上乃
諭內閣諸臣同考訂於是大學士楊一清桂萼翟鑾同
禮部翰林院詹事府禮科詳議太祖皇祖十二章之制
司造之官徇習近訛勿諳古義遂至失真皇上博稽古
典遠會聖祖之心不失乾坤之義乞一一更正萬代遵
守得旨擇吉更正各王府並文武內外官一體更正

冕

洪武十六年定前圓後方玄表纁裏前後十二旒每旒五采玉十二珠五采纁十有二就就相去一寸紅絲組為纓黹纁充耳玉簪導

二十六年定冕版廣一尺二寸長二尺四寸冠上有覆玄表朱裏

永樂三年定冠以皂紗為之上覆曰紕桐板為質衣以錦綺以玉衡維冠玉簪貫紐紐與冠武并繫纓處皆飾

以金係以玄統承以白玉瑱朱紘

嘉靖八年定冠制以圓匡烏紗冒之覆板廣二尺二寸
前後玉珠七綵十二旒以黃赤青白黑紅綠為之玉珩
玉珠導青纁充耳朱纓綴玉珠二尺以周尺為度

袞

洪武十六年定玄衣黃裳十二章日月星辰山龍華蟲
六章織在衣宗彝藻火粉米黼黻六章繡在裳

二十六年定玄衣纁裳

永樂三年定玄衣八章日月龍在肩星辰山在背火華蟲宗彝在袖織成本色領縹襪裾纁裳四章織藻粉米黼黻各二前三幅後四幅前後不相屬其腰有襞積本色裋褐

嘉靖八年定衣玄色六章日月在肩各徑五寸星山在後龍華蟲在袖長不揜裳之六章裳黃色為幅七前三後四連屬如帷凡繡六章分四行火宗彝藻二行米黼黻二行

白羅大帶紅裏

洪武二十六年定兩邊用緣上朱錦下綠錦

永樂三年定在腰及垂皆有緹上朱下綠紐約用素紐

嘉靖八年不用錦

蔽膝隨裳色繡龍虎山文

洪武二十六年定上廣一尺下廣二尺長三尺

永樂三年定隨裳色四章織藻粉米黼黻各二本色有

紉施於縫中其上玉鉤二

嘉靖八年定隨裳色羅為之上繡龍一下繡火三繫於
革帶

王革帶玉佩

洪武二十六年定長三尺三寸

永樂三年定玉佩二各用玉珩一瑀一琚二衝牙一璜
二瑀下玉花垂二玉滴琢飾雲龍文自珩而下繫組五
貫以玉珠行則衝牙二滴與璜相觸有聲其上有二小
綬六采以副之黃白赤玄縹綠纁質

嘉靖八年定革帶前用玉後無玉以佩綬繫而掩之

大綬六采赤黃黑白縹綠小綬三色同大綬綬間施三玉環

洪武二十六年定六采黃白赤玄縹綠織成純女質五百首織三玉環

永樂三年定六采纁質施三玉環龍文織成

白羅中單黼領青黃襪

洪武二十六年以素紗為之

永樂三年定素紗青領標襖裾領織散文十三

黃鞵黃烏金飾

洪武二十六年定朱鞵朱烏

永樂三年定赤色烏用黑鉤純黃飾烏首

嘉靖八年定朱鞵赤烏黃條綠玄纓結

玉圭長一尺二寸

永樂三年刻山四

通天冠服

洪武元年定郊廟省牲皇太子諸王冠婚禮醮戒之類則服通天冠絳紗袍冠加金博山附蟬十二首施珠翠黑介幘組纓玉簪導絳紗袍深衣製白紗內單皂領標襪裾絳紗蔽膝白假帶方心曲領白襪赤舄

皮弁服

洪武二十四年上以百官侍朝皆公服而已獨便服非以示表儀命倣古制為皮弁服絳袍玄圭以臨羣臣凡朔望視朝降詔降香進表四夷朝貢朝覲則服皮弁服

武弁服

嘉靖八年九月上諭大學士張璁會典有親征之條七類造宜襦之祭皆曰具武弁服卿為朕言之璁對周禮司服凡兵事韋弁服釋之者曰韋弁以韎韋為弁又以韎韋為衣裳孔穎達謂韎韋染赤色韋為弁杜佑謂頂少銳為車駕親征中外戒嚴之服是韋弁者武弁也國朝視古損益為皮弁之制有定式矣武弁如皮弁之制皮弁冒以黑紗武弁冒以絳紗隨具圖說進覽上報曰覽圖

制足見博考所繪有鞞形無繫處冠制古銳今圓朕惟上銳者取其輕利如古可也又衣裳鞞舄皆赤色何謂且佩綬俱無而於祭用之可乎璵對曰自古服冕弁未有不用革帶考革帶前繫鞞後繫綬韋弁之鞞正繫於革帶耳武事尚威烈故色多用赤詩韎韐有奭乃天子講武之章奭赤貌韎舄從裳色故皆赤佩綬於禮制不可缺據采芑詩曰服其命服朱芾斯皇有璫璵璫此詩為卿士南征而作其戎服尚備佩玉如此則天子武弁

可推惟聖明裁定上復諭璉武弁冠服衣裳韎舄俱如
古制增革帶佩綬及圭諭禮部擇吉行乃定弁制上銳
色用赤十二縫中綴五采玉落落如星韎裳韎衣韎韐
俱如赤色如常制佩綬革帶如常制俱上繫於革帶舄
如其裳之色玉圭視鎮圭差小剡上方下篆文曰討罪
安民

燕弁服

嘉靖七年二月丁巳上製燕弁服倣古玄端制襯用深

衣色黃初上以燕居冠服未雅諭輔臣張璠考古帝王燕居法服之制璠采輯禮書玄端深衣之文圖註以進上為參定其制示璠且諭璠成朕志璠對曰古服玄端深衣二者其用最廣玄端自天子達於士蓋國家之命服深衣自天子達於庶人蓋聖賢之法服今皇上於玄端俱加文飾於深衣但易黃色誠得損益之道上勅禮部曰常情多修治於明顯怠忽於幽居古聖王治玄端為燕居服玄取其玄邃端取其方正朕酌古玄端之制

更名曰燕弁庶幾深宮獨處以燕安為戒也因勅尚衣監著為式其制如皮弁

衮冕祭服

嘉靖六年四月內大學士楊題為祭服事題稱奉勅內閣朕惟齊明盛服以供祭祀國之重典而祭服乃章之重焉今衮冕之服祭服也被之以祀天享祖其所關豈小小哉且聞衮冕之制玄衣黃裳所以象天地之色衣六章曰日月星辰山龍華蟲裳六章曰宗彝鍾虎火藻

粉米黼黻各有取義乃古今弗易之制亦我聖祖之制也奈何司造之官罔諳典制遂失其真近因與少傅大學士張璉論及已具圖註茲特勅卿等可將圖註會同禮部翰林院參以禮科詳議可否具奏更正夫茲舉也實出朕意非璉之獻諂君有問其臣不敢不以正對如有真識高見當坐咎於予一人勿得乘是而毀我忠良卿等悉心具對若有不同者各具以聞欽此臣等會同各官伏讀聖諭詳閱圖說有以仰窺皇上考古之精議

禮之當真大聖人之制作出於尋常萬萬也竊惟袞冕之制天子所以祀天享祖承上下神祇與他服不同誠至重焉者也自黃帝堯舜以來玄衣黃裳製為十二章之式日月星辰山龍華蟲其序自上而下為衣之六章宗彛鍾虎粉米黼黻其序自下而上為裳之六章自周以後寢變其制或八章或九章已戾於古漢唐宋歷代以來則愈失其義無足言者矣至我太祖高皇帝復定為十二章之制司造之官乃徇襲近訛勿諳古義遂至

失真誠非太祖制作之初意恭惟皇上博稽古典洞見精微遠會吾聖祖之心據今之訛一舉而正之使皆循於古象不失乎乾坤之義而凡聖意之所以遠合乎唐虞者臣璫圖註之文發揚殆盡皇上廣大謙虛猶欲令臣等會同詳議臣等知而不言真有負皇上舍己從人樂取為善之心但思茲制至精至當燦然明備稽諸古帝而勿悖質諸聖祖而有光俟之百世而不惑夫豈自用其聰明而故為變更者乎易訛就正道理當然無以

易此臣等分當効忠而今委不容有一毫異議也伏乞
皇上聖斷不疑將內閣所藏圖畫一一更正仍勅令禮
部通行天下各王府及內外百官朝祭之服其上衣下
裳一體改正及勅工部轉行內外織造衙門今後照依
欽定制式俱行改造毋得因循舊謬則聖制昭明而萬
代永有遵守矣等因題奉聖旨卿等既會看詳議停當
便著欽天監擇日更正制造各王府并文武百官及在
外官員著一體更正禮部知道欽此

嘉靖八年十二月上親定百官朝祭服圖式禮部摹板
繪采頒行中外初章服定制載在會典及內閣秘圖沿
久而訛每遇朝賀祭祀服人人殊及上更制袞冕先出
圖說示閣臣下禮部議定頒行中外而百官承訛如故
會聖旦給事中戴儒請明降定式以便習儀禮部按秘
圖會典酌以今上所定冕服說草上圖註不稱旨上乃
諭內閣親定公服所用革帶照舊朝祭服大帶表裏俱
素兩耳及下垂緣以綠色就以蔽膝佩綬繫之佩玉更

服古制裳并三齊如禮官所言且令議方心曲領名義
於是禮官言方心曲領始於隋時非古也上曰方心曲
領古制不傳況始自隋豈可襲用宜革之餘如圖註通
行中外職官遵行毋得違越仍會議各王府官一體更
正

寶璽備考

皇明製璽

洪武元年春正月初上欲製寶璽未得玉有賈胡浮海

獻美玉曰此于闐王祖父相傳當為帝王寶璽上命製為璽一圭一

獻古玉璽

弘治十三年巡撫陝西都御史熊翀等遣人獻玉璽云鄠縣民毛志學等於趙倫村泥河水濱得之其文曰受命於天既壽永昌玉色純白微青背有螭紐周廣一尺四寸厚二寸翀等以為秦璽復出也事下禮部尚書傅瀚等奏自有秦璽以來歷代得喪存毀真贋之跡具載

史籍今所進之璽其篆刻之文既與輟耕錄等書模載魚鳥篆文不同其螭鈕又與史傳等書所載文盤五龍螭缺一角及旁刻魏隸者不類且又與宋元所得之璽色各不同蓋秦之舊璽更歷變故亡毀已久今陝西所進與昔宋元所得疑皆後世模倣秦璽而刻之者竊惟璽之為用以識文書防詐偽非以為寶玩也自秦始皇得藍田玉刻為璽漢以後傳用之自是轉相因襲巧爭力取意謂得此璽者乃足以受天之命否則歉然愧恥

以為天命去之不知受命以德不以璽為輕重也故求之不得則私刻偽造務以欺人一或得之輒譁然以為秦璽君臣色喜交慶徧視以誇示於天下貽笑取譏千載一律洪惟我太祖高皇帝神謨睿鑒高出千古不師前代之刻製為一代之璽文各有義隨事而施真足以為聖子神孫一代受命之符而垂法萬世者矣列聖相承率由祖訓百餘年別無古璽而受命壽昌之福愈隆愈盛皇上大德懋昭天命匪懈聖躬萬福宗社奠安正

無俟於璽而得天之眷有足徵者今此璽出於陝地乃
遂以為天錫神符交獻謏說盖不自知其非耳宜姑藏
之內府以備燕閒一玩以彰聖德以正人心臣不勝惶
恐之至上從之仍命薄賞志學等白金人五兩

儀衛備考

考設儀衛

洪武元年宣國公李善長等進儀衛上見仗內之旗有
天下太平皇帝萬歲字之旗上乃顧謂善長曰此誇大

之辭也古者九旗之制各有其屬若日月蛟龍熊虎鳥隼龜蛇之類所以昭儀物辨等威若天下太平皇帝萬歲之名此直誇耳莫若以天祐邦家海宇康寧易之庶幾順理耳上既而復語之曰此亦近誇宜併去之

洪武五年三月禮部言周制天子出入條狼氏夾道以辟止行人漢制鹵簿前驅持弓以射窺者唐宋清道幟弩辟止行人惟迎駕之人仗外迎拜今定擬車入有司肅清道路官民勿觀望官員父老迎駕者於仗外路右

俛伏若遇駐驂迎駕之人五拜

洪武六年八月詔禮官考五輅制度上曰五輅起於成周玉輅太奢今止用木輅朱漆之樸素渾堅奢儉得中為二乘一不用革祭祀用之一以皮輓行幸用之

鹵簿大駕

洪武二十六年定凡正旦冬至聖節錦衣衛陳鹵簿大駕於殿之東西凡鹵簿大駕惟郊祀幸太學耕籍田用之如祭社稷祭太廟祭山川則於鹵簿大駕內去白澤

以下至玄武豹尾大涼步輦至大路不設其郊祀前期
視牲則用丹陛駕

丹陛駕

凡常朝日奉天門設丹陛駕於午門外及金水橋南
凡正旦冬至聖節冊拜親王及番使來朝金吾衛於奉
天門外分設旗幟宿衛於午門外分設兵仗衛尉於奉
天殿門及丹陛丹墀設黃麾仗內使監擎執於殿上其
宣詔赦降香則惟設奉天殿門及丹殿儀仗殿上擎執

永樂元年八月禮部言鹵簿中宜有九龍車一乘又舊有金鉦紅鼓鮑燈紅燈請增製上曰禮貴得中過為奢不及為儉先朝定禮審之精矣後世子孫遵用舊章當自朕始豈可輒有增益以啟後世之奢哉九龍車既先朝所無即不可增舊有而今闕者令工部補造

武陳駕

嘉靖二年上將幸天壽山諭禮部巡狩鹵簿當與出郊不同義須尚武尋御製天子武陳駕及大武冠服制式

示尚書夏言且諭之曰朕此二制卿其註圖行今次不及後用之於是言繪二制以進

宮府備考

宮闕

更奉天殿名

嘉靖六年八月甲申大學士嚴嵩疏言昨奉聖諭殿名奉天是已即天也皇祖何取臣仰窺聖德不以天自居傳記有曰人君其尊如天孔子作春秋繫王於天又書

曰天命天討言人君賞罰不自己出一歸於天祖制已久宜勅禮官集議以俟聖裁上曰卿釋奉天二字義甚正第非題扁用也遂勅部曰人君奉天已身坐之終未安况災燬初罹兩蒙昭示名稱之舊不可復於是禮部會議言皇祖肇造之初名曰奉天者昭揭以示虔爾既以命名則是昊天監臨儼然在上臨御之際坐以視朝似未安修復之始乞睿斷更以答天庥上曰俟至期奏於南郊太祖更之三十七年重建奉天門更名曰大朝

門四十一年九月甲申更名奉天殿曰皇極初殿工成
工部請額上諭內閣曰朝殿太祖名之成祖因之不更
上天垂示已兩矣嵩謂太祖定名莫非奉天改之必前
代所無之名今只仍舊惟天字當出奉字上於是部臣
以扁式請為橫扁天字居中上出奉殿二字兩傍稍下
相對上謂不雅乃取尚書洪範字義更名

府第

親王府第

洪武九年春正月詔禮部親王宮殿門廡及城門樓皆覆以青色琉璃瓦如東宮之制又命中書省臣惟親王宮得飾朱紅大青綠餘居室止飾丹碧中書省臣言親王居室飾大青綠亦無過度上曰惟儉養德惟侈蕩心諸子方及冠年去朕左右豈可使靡麗蕩其心

洪武十二年王府營造訖工繪圖以進其制中曰承運殿十一間後為園殿次曰存心殿各九間承運殿兩廡為左右二殿自存心承運周迴兩廡至承運門為屋一

百三十八間殿後為前中後三宮各九間宮門兩廂等堂九十九間王城之外周垣四門其南曰靈星餘同王城名周垣之內堂庫等室一百三十八間凡為宮殿室屋八百一十一間

弘治八年定王府制前門五間門房十間廊房一十八端禮門五間門房六間承運門五間前殿七間周圍廊房八十二穿堂五間後殿五間家廟一正房五間廂房六門三間書堂一正房五間廂房六門三間左右盥頂

房六宮門三間廂房十前寢宮五間穿堂七間盪頂房
一東西各三所每所正房三後屋三廂房六多人房六
連漿糲房六淨房六庫十儀仗庫三間廂房六間三門
正房五後房五廂房十二茶房二淨房一世子宮正房
三間後房五間廂房十六

郡王府第

天順四年定郡王每位蓋府屋共四十六間前門樓三
間中門樓一間前廳房五間廂房十後廳房五廂房十

廚房三庫房三米倉三馬房三

公主府第

洪武五年定公主府第之制禮部言唐宋公主視正一品其府第並用正一品制度今擬公主府第廳堂九間十一架施花樣獸頭梁棟斗拱簷桷彩色繪飾惟不用金正門五間七架大門用綠油銅環石礎牆磚鑄鑿玲瓏花樣從之

郡王府承運門制

洪武九年靖江王相府奏請靖江王府承運六門金釘
朱戶之制命員外郎張籌等考古制以聞籌等奏按韓
詩外傳諸侯有德者錫朱戶而金釘無所考今親王府
承運門既用金釘靖江王府宜降殺如公主府掩錢之
制

符信備考

符牌

造符牌

洪武四年上名工部造用寶金牌及軍國調發走馬符牌用寶為小金牌二中書省大都督府各藏其一遇制書發兵省府以牌入而後內府出寶用之其走馬符牌凡有軍國急務遣使者佩之以行禮部因以唐宋走馬銀牌之制以進上令寸尺從唐其式如宋務令製作精緻凡造金字牌二十銀字牌二十文曰符令所至即時奉行違者必刑俱以鐵為之濶二尺五分長五寸上鉞二飛龍下鉞二麒麟牌首為圓竅貫以紅絲條藏之於

內府之中一遇有調發則出之

牙牌

牙牌制

洪武十一年三月丁酉始制牙牌給文武朝臣其制以象牙為之刻官稱於上凡朝參佩以出入有不佩者門者却之私相借者論如律有故則納之內府其在外來朝百司官無牌者則於各門附名以入勲臣以勲字親臣以親字文臣以文字武臣以武字文武官之與陪祀郊

廟及執事人亦給牙牌有圓花長花花素之別凡諸得給牌者有故則檢籍而納之

正德十六年九月禮部覆禮科都給事中邢寰奏牙牌惟常朝職官得以懸帶正德以來權奸竊柄傳旨陞官乞清查以重名器得旨文職不朝參者不得濫給牙牌武官進御侍班佩刀執金爐者給與

命婦牙牌

嘉靖九年二月定命婦牙牌式視陪祀官殺三之一

嘉靖二十四年十一月丙申禮科都給事中陳邦脩言
百官出入禁門帶牙牌以防奸偽今虛衝帶俸及襍流
供事者如文思院大使趙成等十餘人皆得關領朝參
牙牌宜查奪上以名器當慎令禮部尚寶司禮科查奪
有違例者以名聞

武臣金銀牌

洪武四年六月詔定武臣金銀牌制參考舊典武臣懸
帶金牌濶二寸長一尺上級雙龍下級二伏虎牌首尾

為圓竅貫以紅絲條指揮金牌雙龍雙虎千戶佩鍍
金銀牌獨雲龍獨虎符百戶佩素雲銀牌符凡造雙龍
雙虎符金牌五百面獨雲龍獨虎符鍍金銀牌二千面
素銀牌一萬一千面共一萬三千五百面上親為文鈐
之曰上天祐民朕乃率撫威加華夏實憑虎臣賜爾金
符永傳後嗣天子饗祀郊廟若視學籍田勲衛扈從及
公侯駙馬都督日直衛錦衣當直則給金牌有龍者有
虎者麒麟者獅者雲者以官為差皇城金吾禁夜五城

夜巡則給令牌虎賁巡城則給銅符九門守衛則給銅牌錦衣校尉入直則給雙魚銅牌

扈駕銅牌

洪武六年五月命造扈駕先鋒金字銀牌一千五百面尋改為守衛金牌以銅為之塗以金高一尺濶三寸分仁義禮智信五字仁字鈐獨龍蟠雲花公侯伯都督佩之義字鈐伏虎蟠雲花指揮佩之禮字鈐獬豸蟠雲花千戶衛鎮撫佩之智字鈐獅子蟠雲花百戶所鎮撫佩之

信字釵蟠雲花將軍佩之二面俱篆文牌首竅貫青絲
鎮撫及將軍隨駕應直宿衛者關給備帶下直則納之
國朝將軍選鋒幹勇力者為之號曰天武將軍立將軍
千百戶總旗統其衆凡早晚朝及宿衛扈駕執金瓜披
鐵甲佩弓矢冠紅纓鐵盔帽列侍左右如大朝會則披
金甲金盔帽列侍殿廷俱有定數初隸拱衛指揮使司
後隸錦衣衛止稱曰將軍

關領通規

正德五年十月內該本部題准各官懸帶牙牌仍照舊
例司禮監科造完備送尚寶司給發

凡各官關領牙牌本部准尚寶司手本開稱某等衙門
某等官原領牙牌驚墨透徹字號模糊不堪懸帶及某
衙門某官應該關領牙牌查無收貯俱各相應料造等
項本部即查正德年間題准事例開坐請旨

懸帶員數

文職應帶牙牌官員 九卿等衙門及內閣辦事等官

文職不應帶牙牌官員 太醫院帶俸及御藥房并各
營供事官員 工部文思院等衙門帶俸及內官監辦
事匠作官員 銓注在京各衙門帶俸專在各營書辦
官員 工部所屬軍器鞍轡等局官員

武職應帶牙牌官員 五府并錦衣衛堂上帶俸王親
之家及公主親男 錦衣衛左千戶七所并鎮撫司千
百戶若係執捧金爐侍駕者許帶 凡多餘見任必須
駁查或分管存恤守衛管屯管操管倉管馬管廠管首

宿管巡菁等項職任明白方許給領 殿前御前侍班
帶刀答應官員

武職不應帶牙牌官員 神木廠官員 太常寺犧牲
所官員 錦衣衛五所七所并鎮撫司及在京各衛所
帶俸指揮千百戶等官專在內府各監局御藥整容等
房供事官員 各府轄各衛及旗手等親軍衛雖稱多
餘見任及一應雜差但駁查回報不明一概不與

嘉靖二十八年五月內該本科都給事中陳邦脩等題

為清理牙牌以慎名器事奉聖旨這朝參官牙牌名器所當慎重禮部便會同尚寶司并該科查理應該追奪改給的明白具奏今後再有違例冒領的著指名參奏究治欽此該本部查得正德十六年九月內該禮科都給事中邢寰等題為遵詔制刷舊例以新政治事本部覆議得工部文思院等衙門帶俸專在內府內官監辦事匠作等官不係朝參之列冒領牙牌相應裁革等因奉聖旨是各該官員不係朝參之類舊額原無牙牌的

一體裁革武職官專在殿在御前侍班帶刀答應并執捧金爐的還給與他欽此又查得本部見行事例內一款在京各衛所帶俸專在內府各監局御藥等房供事指揮千百戶等官俱不該帶牙牌又一款尚膳監千百戶該本監於正德十六年十二月題奉聖旨既有永樂年間事例准給與他欽此又查得嘉靖四年七月內該內官監太監郭紳等題稱本監官匠順天府知事工部營繕所所正等官孫志等忠義等衛副千戶等官路英

等在工効勞乞給牙牌等因奉聖旨都准他欽此今該前因本部議得牙牌之設明開朝參官懸帶此牌則凡不係朝參者其不應懸帶明矣今除各衙門大小官員在任朝參例該給領牙牌者無容別議外其通政司等工部營繕所等衙門帶俸見在內府內官等監辦事匠作等官錦衣衛等衙門帶俸見在內府各監局御藥等房寄名供事等官俱不在朝參人員先年已經遇例裁革隨該各官具奏復蒙准給茲欲仍舊給與朝參牙牌

似非其義欲徑革奪則出內府禁密之地譏察不便相應議處臣等查得內府尚寶司見貯有先年舊牌數百餘面原開有入內府字樣合將前項牙牌闕出換給各官懸帶如數不足另行照式造補原領朝參牌面通行送繳其各衛所等衙門除掌印僉書管屯管存恤坐營坐司侍衛等官應給朝參牙牌外其餘多餘見任并一應雜差等官不係朝參官員之數又無內府供役之因合行革奪及有在外納粟填註職事朦朧闕給妄肆誇

耀并考選斥退因事閒住等官舊領牙牌不行送繳俱屬故違合送法司提問均乞聖裁奉聖旨依擬行欽此

懸帶別例

通政使司等工部營繕所等衙門帶俸見在內府內官監辦事匠作等官錦衣衛等衙門帶俸見在內府各監局御藥等房寄名供事等官改給與內府字樣牙牌懸帶嘉靖二十八年五月內該本部議題奉聖旨依議行欽此

尚膳監千百戶該本監於正德十六年十二月題奉聖
旨既有永樂年間事例准給與他欽此

錦衣衛左千戶等所并鎮撫司千百戶等官於嘉靖六
年十月內奉該本部覆題奉聖旨既係朝參官員牙牌
准給與懸帶欽此

太常寺犧牲所千百戶嘉靖八年正月內奉乞牙牌該
本部覆題奉聖旨准給與牙牌懸帶欽此

宛大二縣典史嘉靖八年十二月內奏乞牙牌本部覆

題奉聖旨准給與牙牌懸帶欽此

重領事例

嘉靖十一年五月戶部主事尹尚賓奏稱因馬驚墜地跌損牙牌乞恩認罪事該本部覆題看得本官缺損牙牌似當參究但因馬驚奔逸事出不測情有可原合無將本官原損牙牌查繳仍行尚寶司另行關給奉聖旨准另關給欽此

嘉靖二十六年正月行人章熙奏同前事奉聖旨禮部

查了來說欽此該本部行查明白及查與主事尹尚賓
事例相同題覆乞從寬宥奉聖旨既查無他故原牌著
送繳另給章熙免究欽此

嘉靖三十年正月靖遠伯王瑾奏為燒損牙牌乞恩認
罪事該本部覆題看得本爵傷損牙牌應參究問但據
覆查委係燒損失事出不測似應俯賜寬宥奉聖旨
王瑾姑免究牌面准另給欽此

犧牲所官請牙牌

弘治八年太常寺卿齊章等奏犧牲所百戶錢堅等請給常懸牙牌以便禁門出入禮部謂本所居城外而堅等又非朝參官若遇進牲供祀臨期自有供事牙牌所請宜勿許從之

定清查牙牌法

弘治十六年時有王河橋道邊拾工部文思院副使牙牌者禮部奉旨查審乃成化十年六月文思院帶俸副使馮宇所領宇以弘治元年革罷莫知所之而其牌遂

私假於未革職者懸帶以故遺失後畏罪不敢言因奉
牙牌本為朝參官員而設文思院匠官出入禁門自有
牌面照驗乃假以不便為辭援朝參官例一概冒領且
自以冠帶不便工作往往繫牙牌於條上所以易於遺
失今後宜一切禁絕年終諸司將各官原領牙牌字號
并年月日期備開冊了送尚寶司清查違者治罪從之

禮科奏稽牙牌

嘉靖元年禮部覆禮科給事中邢寰奏牙牌惟常朝職

官得以懸帶正德以來權奸竊柄官以傳乞而陞牌以
賁緣而得乞賜清查以重名器得旨文職不朝參者不
得濫給牙牌武官進御侍班佩刀執金爐者照舊給與
供事執事別給牌面

嘉靖二十八年內府供事匠作武職等官皆帶朝參
牙牌曾奉旨革奪旋復之至是禮科都給事中陳邦脩
以為言禮部覆奏大明會典所載在京文武官員出入
禁門各有所帶牌面而牙牌內有執事供事朝參之別

執事供事等牙牌皆臨時關領如期繳進惟朝參牙牌例得朝夕懸帶盖非徒為關防之具亦以等威之示辨也若虛銜帶俸供事執事人員委不宜一概冒領第出入禁密若一切革奪則又不便譏察及查尚寶司見貯舊牌數百上有入內府字樣請以此給之庶關防既便而名實亦稱至於衛所武官自掌印僉書侍衛之外見任雜差等官不朝參供役者盡革奪之其納粟填註冒關牙牌及罷退閑住官舊所關領不繳者俱行逮問報

可

使節

使節之制

洪武二十三年八月詔考定使節之制禮部奏漢光武時節以竹為之柄長八尺其毛三重而黃紹韻會註漢節柄長三尺毛三重以旄牛尾為之紹從三尺之制

禮部志稿卷六十三

欽定四庫全書

禮部志稿卷六十四

明 俞汝楫 編

章服備考

文武冠服

初定冠服志

洪武元年禮官議上冕服以下制并及羣臣公侯以下
朝祭冠服周制公侯伯以下朝祭皆用冕服燕居則用

玄端服公侯伯子男朝天子則執圭以合瑞明帝時公卿列侯朝覲皆玄端絳衣其助祭三公諸侯用山龍九章九卿以下用華蟲七章皆備五采大佩赤舄絢履玄衣纁裳冕皆廣七寸長一尺二寸前圓後方朱綠裏玄表前垂四寸後垂三寸繫玉珠為九旒以其綬采色為組纓三公諸侯青玉珠卿大夫五旒黑玉珠皆有前無後郊天地祀明堂則服之唐羣臣助祭一品衮冕二品鷩冕三品毳冕四品繡冕五品玄冕六品至九品爵弁

其朝服陪祭朝會大事則服之公服朔望朝謁見皇太子則服之弁冕尋常公事服之武官常服平巾幘袴褶笏三品以上前屈後直五品以上上挫下方用竹木宋羣臣助祭親王中書門下服九旒冕九卿七旒冕四品五品五旒冕為獻官則服之大祝奉禮服平冕無旒其朝服用梁冠一品二品侍祠朝會五梁冠諸司三品御史臺四品兩省五品三梁冠四品五品兩梁冠中書門下則五梁冠加籠巾貂蟬御史大夫中丞三梁冠加獬

豸衣有中單六品以下兩梁冠無中單去劔佩綬常朝
公務一品至三品服紫玉帶四品五品服緋金帶六品
七品服綠銀帶八品服鍤石帶元豐制去青服紫者佩
金魚服緋者佩銀魚今斟酌唐宋凡朝賀辭謝等禮皆
朝服用赤羅衣白紗中單皆用皂飾領緣裳與衣同皂
緣蔽膝同裳色大帶用赤白二色革帶佩綬白鞢黑履
梁冠一品公侯三師及左右丞相左右大都督左右御
史大夫冠八梁國公加籠巾貂蟬從一品平章同知都

督七梁其帶用玉鈎鐮錦綬上用綠黃赤紫四色絲織成雲鳳花樣下結青絲網小綬用玉環二二品冠六梁革帶用犀鈎鐮小綬用犀環綬同一品從二品冠五梁革帶用金鈎鐮錦綬用黃綠赤紫四色絲織成雲鶴花樣小綬用金環二三品冠四梁革帶綬環俱同四品五品冠三梁革帶用鍍金鈎鐮錦綬用黃綠二色絲織成鴻鴻花樣小綬二用銅鐶二其笏五品以上用象九品以上用槐木其陪祀祭服制與朝服同惟衣色用青加

方心曲領朔望朝見及拜詔降香侍班有司拜表朝覲
則用公服皆赤色一品服大獨科花直徑五寸玉帶二
品小獨科花直徑三寸花犀帶三品散答花直徑二寸
金帶鏤葵花一蟬八四品小雜花直徑一寸五分金帶
鏤葵花一蟬六五品花同四品金帶葵花一蟬四六品
七品花同五品直徑一寸銀帶六品鍍金葵花一蟬三
七品鍍金葵花一蟬二八品九品無花通用光素銀帶
笏同前制幘頭靴並如宋元常服用烏紗帽金繡盤領

衫文官大袖濶一尺 武官弓袋窄袖紵絲綾羅隨用
束帶一品以玉二品犀三品金釵花四品素金五品銀
釵花六品七品素銀八品九品角

命婦冠服周制追師為外內命婦之首服鄭玄云外內
命婦衣鞠衣襴衣者服編衣祿衣者服次內司服辨內
外命婦之服鄭玄云內命婦九嬪鞠衣世婦展衣女御
祿衣外命婦其夫孤也服鞠衣其夫卿大夫也則服展
衣其夫士也則服祿衣三夫人及公之妻其服闕翟以

下乎侯伯之夫人綸翟子男之夫人亦闕翟二王之後
褱衣漢制朝會公卿列侯二千石夫人首飾紺繒幘簪
珥服用蠶衣唐首飾兩博鬢飾以寶鈿服用翟衣一品
花釵九樹翟九等二品花釵八樹翟八等三品花釵七
樹翟七等四品花釵六樹翟六等五品花釵五樹翟五
等寶鈿視花釵之數翟衣青質繡翟編次於衣及裳一
品翟九等二品翟八等三品翟七等四品翟六等五品
翟五等並青紗中單黼領朱縠標褱裾蔽膝隨裳色以

緞為緣領加文繡重雉為章二等大帶衣色青衣革帶
青鞵烏佩綬宋制青織羅為衣繡為翟編次於衣及裳
素紗中單今擬依唐宋制度惟色不用青隨其夫與子
之服色唐宋命婦一品至五品今制一品至七品其六
品七品母妻既命於朝冠服亦當一體六品兩博鬢花
釵四樹翟四等寶鈿如花釵之數七品兩博鬢花釵三
樹翟三等寶鈿如花釵之數餘同前製諸命婦私居服
并八品九品未命之婦並用團衫繫腰不許仍用異俗

服兩截短衣議定以聞上覽之曰卿等所擬殊合朕意
但公爵最尊而朝祭冠服無異侯伯以下於禮未安今
公冠八梁侯及左右丞相左右大都督左右御史大夫
七梁俱加籠巾貂蟬餘從所議尋命朝服衣裳中單領
緣俱用青祭服領緣仍用皂其公服一品至四品赤色
五品至七品青色八品以下及未入流雜職俱綠色大
帶一品用玉二品花犀三品四品用金以荔枝為花五
品以下用銀八品以下用角

官員家屬冠服

洪武元年十二月癸未詔定官員親屬冠服之制禮部尚書崔亮等議凡內外官員父兄伯叔子孫弟姪用烏紗帽軟脚垂帶圓領衣烏角帶在外閭者員領衣烏角帶帽四角稍垂內外衙門隸卒烏紗平頂巾雙環圓領衣用紬絹布繫腰黑革帶銅鐵骨角束子軍士隨軍裝擣手與隸卒曾經委用閑良官員用烏紗帽軟脚垂帶員領衣烏角束帶從之

初製朝服公服

洪武三年命省部官會太史令劉基參考歷代朝服公服之制凡大朝會上袞冕御殿則服朝服見皇太子則服公服仍命制朝服公服以賜百官

朝臣服色依品級

洪武三年給賜朝臣袍帶凡二千八百一十三人先是禮部言各官有先授散官與見任職事高下不一者如監察御史董希哲前授朝列大夫澧州知州而任七品

職事右師郎中宋冕前授亞中大夫開封知府給事中
李仁前授亞中大夫黃州知府而並任五品職事散官
與見任之職不同故其服色亦不能無異乞定其制乃
詔省部臣定議於是禮部奏唐制服色皆以散官為準
元制散官職事各從其高者故服色亦因之國朝初服
色並依所授散官蓋與唐制同上曰自今服色宜準所
授散官不當計見任之職於是所賜袍帶皆從原授散
官給之

命婦霞帔

洪武五年詔中書省臣及禮部所擬文武官命婦服飾用大衣霞帔既合古制霞帔以金繡之文為等第若民間婦人禮服惟以素染色絕不用文繡

外命婦冠服

洪武四年五月定外命婦朝服之制先是上以古者天子諸侯服袞冕后與夫人褱翟今羣臣既以梁冠絳衣為朝服不敢用冕則外命婦亦不當服翟衣以朝命禮

部議之至是禮部奏外命婦以山松特髻假鬢花鈿真紅大袖衣珠翠蹙金霞帔為朝見之服以珠翠角冠金珠花釵濶袖雜色綵緣為燕居之服

洪武五年十一月定命婦團衫之制以紅羅為之繡重雉為等第一品九等二品八等三品七等四品六等五品五等六品四等七品三等其餘不用繡雉

品官家用服

洪武六年詔定品官家用祭服公服上諭禮部臣曰古

者士大夫祭宗廟亦有祭服其見私親尊長亦必有公服其議制度等殺以聞於是定議品官之家私尊長而用朝君公服於理未安宜別製梁冠絳衣絳裳革帶大帶白鞵烏舄佩綬其衣裳去緣襪三品以上用佩綬三品以下不用其祭服三品以上去方心曲領三品以下并去佩綬從之仍令如式制祭服賜公侯各一襲以為祭家廟之用

使外國服色

成化七年戶科都給事中邱弘行人韓文奏凡使外國者例賜侯服色自備釵花金帶至其國則繫之今臣等奉使琉球欲從衆則事涉擅專欲遵制則官止七品服色不稱乞賜鍍金花帶以壯國威事下禮部尚書鄒幹等覆奏以為無例而止

忠靜冠服

嘉靖七年上既製燕弁服諭張璁曰古尚儉今尚華古玄端通於上下茲為等威辨之卿其承朕志璁言古玄

端用廣達於上下今品官燕居競為奇服以亂典章乞如玄端別為簡易制以昭布天下上因製忠靜冠服併以圖冊示禮部勅諭曰我祖宗稽古定式凡享祀郊廟視朔視朝弁冕裳服至於品官朝祭服公服常服各有等級不可變比年以來衣服詭異達官顯士與市井同走卒役厮與儒流並上下無辨民志何定禮曰衣服在躬不知其名曰罔又曰不學雜服不能安禮朕制曰燕弁善與人同令從君出故欲倣於有位因復酌古玄端

制更名曰忠靜庶幾乎進思盡忠退思補過也夫君子
大復古重變古非泥古也因時制宜各有法象意義宜
令如式製造在京許七品以上官及八品以下翰林院
國子監行人在外許方面官及府堂官州縣正官儒學
教官服之武官止都督以上許服其餘不得濫服至於
詭異之服悉行禁革夫衣裳在笥所以尚賢車服以庸
所以昭德爾羣臣尚當稽名見義期成莪莪之譽無侈
楚楚之容如勅行

保和冠服

嘉靖七年十月甲子遼府光澤王寵滾奏聖製燕弁忠
靜冠服中外臣工受賜得服者咸以為榮乞并賜宗親
官屬章下禮部議上曰俟別製頒行十二月上諭禮部
朕惟帝王制禮推己及人施自親始朕以王道在謹獨
故酌古立端之制命之曰忠靜冠服錫於有位朕已嘗
及宗室諸王其制尚未備欲圖之未遑今光澤王所請
有獲朕心朕因酌燕弁及忠靜冠之制為之製式使之

上無所僭下無所逼其載圖說名之曰保和冠服夫上
下之分猶天地之不可易各知其分然後能相保而國
家治安令自郡王長子以上其製式開載已明鎮國將
軍輔國將軍奉國將軍鎮國中尉輔國中尉奉國中尉
以及左右長史審理正副紀善教授伴讀等官俱宜照
忠靜冠服以品官之制服之其郡縣鄉君儀賓雖各有
品級然非儒官比不得概服其餘各官不許服以防過
濫於戲親欲貴也愛欲富也故禮制宜徙敦崇名以命

之器以別之故品節不容假借夫忠靜冠服品式之不同者尊賢之等也保和冠服品式之不同者親親之殺也等殺既明名分攸定庶幾知所保矣保斯和和斯安此錫名之義也孟軻氏曰樂天者保天下畏天者保其國禮部以其說頒布諸王府如勅遵行禮部隨以圖冊刊刻進呈上覽之分諸王府頒布天下

品官祭服

洪武元年定凡上親郊廟社稷文武官分獻陪祀則服

祭服與朝服同惟衣色尚青加方心曲領

品官朝祭服

嘉靖八年十二月丁丑上親定百官朝祭服圖式詔禮部摹板繪采頒行中外初章服定制載在會典及內秘圖沿久而訛衣襲乎裳無上下之辨帶綴於鞞無繚約之制環有金玉等級槩織於綬畧似環形綬隨品級花樣但取華美任意粧飾裳之襞積煩簡不同佩惟玉璧銅簪雜用每遇朝賀祭祀服人人殊及上更制袞冕百

官承訛如故會聖旦給事中戴儒請明降定式以便習儀禮官按秘圖會典酌以今上所定冕服說草上圖註不稱旨上乃諭內閣親定公服所用革帶照舊朝祭服大帶表俱素兩耳及下垂緣以綠色就以蔽膝佩玉更復古制裳并三齊如禮官所言且令議方心曲領名義於是禮官言方心曲領始於隋時非古也上曰方心曲領古制不傳况始自隋豈可襲用宜革之餘如圖註通行中外職官遵行毋得違越仍會議各王府一體更正

朝官履

洪武六年二月命朝官製常服禮鞋先是百官入朝遇雨皆用釘靴進趨之間聲達殿陛侍儀司官以為不肅請禁之上曰古者朝臣入朝有履自唐以來始用靴行之已久不可猝變宜令各官為軟底皮鞋籠於靴外出朝則釋之

內使冠衣

洪武元年十二月定內使冠服制凡內使冠服烏紗描

金曲角帽衣用背花團衫窄袖衫烏角束帶靴用紅扇面黑下樁外人不許相同

洪武三年冬十月壬戌重定內使服飾之制上諭宰臣凡內使監未有職名者當別製冠以別監官禮部定擬內使監凡遇朝會依品具朝服公服行禮其常服葵花胸背團衫不拘顏色烏角束帶烏紗帽犀角帶其內使無品從者常服團領衫無胸背花不拘顏色烏角束帶烏紗帽垂軟帶年十五以下者惟戴烏紗小帽從之

宮人冠服

洪武四年定宮人衣用紫色團領窄袖徧刺折枝小葵花以金圈之珠珞縫金束帶紅裙弓樣鞋上刺小金花烏紗帽飾以花帽額綴團珠結珠鬢梳垂耳飾

外國陪臣冠服

宣德三年冬十月賜朝鮮國世子六梁冠一先是朝鮮國王李祹奏洪武中蒙賜國王冕服九章陪臣冠服比朝臣遞降二等蓋陪臣一等比朝臣第三等得五梁冠

服永樂初先臣芳遠遣世子提入朝蒙賜五梁冠服臣切惟世子冠服乃同陪臣一等乞為定制上從之故有是命

雜流冠服

侍儀等冠服

洪武二年詔定侍儀舍人及校尉刻期冠服禮官議曰古者朝覲必有儔相之職公西華端章甫者儔相之服也漢唐以下置謁者凡朝會掌引導行禮漢用玄冠絳

衣唐用武弁絳公服宋謂之禮直官用公服元謂之侍
儀舍人用展脚幘頭窄袖紫衫塗金帶皂靴其校尉即
周官太僕隸僕掌王之出入警蹕者其服制禮書不傳
漢晉衛士有朱衣絳袍黑袴褶之制唐執仗之士首服
有武弁平巾幘錦帽金鵝帽花脚幘頭黃絕巾抹額其
服有朱色繡袍大袖勒帛諸色繡兩襠大口袴銀帶繡
戎服諸色繡寶相花衫革帶碧衫抹金銅帶錦縵蛇宋
執仗之士大畧與唐同元執仗士首服用交脚幘頭鏤

金額交脚幘頭五服絕巾展脚幘頭鳳翅唐巾其服有
紫梅花羅窄袖衫塗金束帶白錦汗袴緋繡寶相花窄
袖衫生色寶相花袍勒帛雲龍靴佩寶刀紫羅襪線襖
今擬侍儀舍人導禮依元制用展脚幘頭窄袖紫衫塗
金束帶皂紋靴常服烏紗帽盤領衫校尉執仗亦依元
制首用金額交脚幘頭諸色辟邪寶相花裙襖銅葵花
束帶皂紋靴刻期冠方頂巾衣胸背鷹鷂花腰線襖諸
色潤匾絲條象牙雕花環行滕八帶鞋制曰可

侍儀服

洪武四年二月乙卯朔侍儀司言文武百官朝服各從品級侍儀舍人引班執事宜有定制乃命中書省定擬侍儀舍人并御史臺知班引禮執事冠進賢冠無梁服絳色衣其蔽膝及履襪革帶大帶槐笏與九品同惟不用中單從之

齋郎舞生冠服

洪武五年十月己丑命擬齋郎樂生文武舞生冠服之

制齋郎黑介幘漆布為之無花樣服紅絹窄袖衫紅生
絹為裏皂皮四縫靴黑角帶文武舞生及樂生黑介幘
漆巾為之上加描金蟬服紅羅絹大袖袍胸背畫纏枝
方葵花紅生絹裏加錦臂鞢二皂皮四縫靴黑角帶武
舞生武弁以漆布為之上加描金蟬服飾靴帶並同文
舞生

雜流官冠服

洪武四年冬十月甲午定未入流冠服凡在外諸處提

控案牘及吏目典史稅課司閘壩等官冠服皆准侍儀
舍人冠無梁服赤羅服青緣飾赤羅蔽膝烏角帶紅白
大帶槐木笏白襪黑履不用中單去佩綬

未入流官用公服

洪武二十四年浙江按察使司僉事鮮敏言舊制凡各
處未入流官遇朝賀進表用烏紗帽紅圓領衫黑角帶
陪班行禮今制在京一品而下至雜職俱用公服而在
外未入流官仍如舊制於禮未宜請得如在京例上可

其奏詔在京在外未入流官凡遇行禮皆具公服

在外未入流品官祭服

洪武二十九年六月丙子詔在外未入流官陪祭俱用祭服先是淮安鹽城縣儒學教諭王孟上言公服以朝祭服以祀今在外凡祀山川諸神流官具祭服未入流官具公服然公服既於朝賀迎接諸禮用之而又服以祀神理有未宜且未入流官公服之制自八品以下皆同則祭服亦宜與之同上是其言詔自今未入流官凡

祭皆用祭服與九品同

士庶冠服

四方平定巾

洪武三年命製四方平定巾式頒行天下初上既即位更制度凡官民男女衣冠服飾悉復中國之制至是又以士民所服四帶巾未盡善復製四方平定巾頒行天下令士人吏民咸如式製服之皂隸伶人如初所定以異其制

生員巾服

洪武二十四年上以學校為國儲材而士子巾服無異吏胥宜有以甄別之命工部製式以進上親視必求典雅凡三易其製始定自是士子衣冠綽有古風

軍士服色

洪武二十一年九月戊寅定中外衛所步軍士服色惟駕前旗手一衛用黃旗軍士力士俱紅裋襖凡裋襖長齊膝窄袖內實以棉花旗幟各分記號用青藍為邊玄

黃黑白間色俱不得用凡為旗幟衣裳布絹綿花蘇木棗木之類皆官給之毋令軍士自備

僧道服色

洪武十五年十二月乙酉定天下僧道服色凡僧有三曰禪曰講曰教禪僧茶褐常服青條玉色伽裟講僧玉色常服深紅條淺紅袈裟教僧皂常服黑條淺紅袈裟僧官如之惟僧錄司官袈裟緣文及環皆飾以金道士常服青法服朝衣皆用赤色道官亦如之惟道錄司官

法朝服衣緣文飾金

凡在京道官紅道衣金襴木簡在外道官紅道衣木簡不用金襴道士青道服木簡

冠服禁令

服色禁制

洪武二十三年三月甲子定官民服飾先是上見朝臣衣服日就短窄有乖古制乃命禮部尚書李原名國子司業龔敷參酌時宜俾存古意原名等議定文官衣長

自領至裔去地一寸袖長過手復回至肘袖樁廣一尺
袖口九寸公侯駙馬與文職同耆民儒士生員同文職
惟袖過手復回不及肘三寸庶民衣長去地九寸袖長
過手六寸袖樁廣一尺袖口僅出拳軍人衣長去地七
寸袖長過手五寸袖樁廣不過一尺窄不過七寸袖口
僅出拳從之頒示中外

洪武二十二年十二月申嚴巾帽之禁凡文武官除本
等紗帽外遇雨許戴雨帽公差出外許戴帽子入城不

許其公差人外出外者亦如之將軍力士校尉旗軍常戴頭巾或槓腦官下舍人并儒生吏員民人常戴本等頭巾鄉村農夫許戴斗笠蒲笠出入市井不禁不親農桑者不許

景泰四年令錦衣衛指揮侍衛者得衣麒麟服色從錦衣衛指揮同知畢旺授永樂中例請也

天順二年令官民人等衣服勿用蟒龍飛魚斗牛大鵬像生獅子四寶相花大西番蓮大雲花樣并玄黃紫及

玄色樣黑綠柳黃薑黃明黃等色

成化三年令官民人等勿僭用服色花樣

弘治元年正月禮部覆左副都御史邊鏞言乞禁內外官僭乞蟒衣按國朝品官服色無蟒衣之制考之爾雅韻書蓋蟒乃蛇屬非龍類蟒無角足龍則角足具焉今織蟒為龍形請如鏞言凡內外官無間新舊悉令盡繳不許織造上是之命原受賜者聽其服用餘悉令還官此後不許再乞

嘉靖六年令在京在外官民人等不得濫服五彩粧花織造違禁顏色及將蟒龍造女衣夷人不許擅買違式衣服

十六年令在京在外文武官員其大紅紵絲紗羅服惟四品以上官及在京九卿翰林院詹事府春坊司經局尚寶司光祿寺鴻臚寺五品堂上官經筵講官得服其餘俱青綠錦繡遇吉禮紅布祔褐

洪武三十年令致仕官服色與見任同若遇朝賀及謝

恩見辭具服行禮

凡年老致仕及侍親辭閒官員許用紗帽束帶若為事黜降者服與庶人同

凡官民服色冠帶貴賤有等上可兼下下不可僭上官員致仕與見任同其祖父有官身歿非犯除名子孫許居父祖房舍衣服車馬比祖父同

職官一品至四品帽頂帽珠繫腰用金玉珠寶粧飾五品六品帽頂許用金玉帽珠用珊瑚琥珀繫腰用金銀

犀角帶七品至九品帽頂許用銀或鍍金帽珠用水晶琥珀繫腰用銀減鐵以上帽子帽花許用製造字樣及龍鳳文靴子通用金綿花樣

申明靴禁

洪武二十四年七月壬申申明靴禁先是常禁民間製靴不許裁為花樣及以金線裝飾而富商大賈奸民猾胥末技賤工及軍中無賴少年往往冒犯恣為淫巧裁為花樣嵌以金線藍條蔑敦樸之風亂貴賤之等甚者

詐為公侯大臣家子姪出入市中為奸利事聞詔禮部
嚴禁之惟文武百官并同籍父兄伯叔弟姪子壻及儒
士生員吏典知印承差欽天監天文生太醫院士瑜珈
僧正一道士將軍散騎舍人帶刀之人正伍馬軍總小
旗教讀大誥師生許穿靴同其北平山西山東陝西河
南并直隸徐州地寒人民許穿牛皮直縫靴出外不許
其庶民商賈技藝步軍及軍下餘丁管步軍總小旗官
下家人火者皂隸伴當在外醫卜陰陽人皆不許止許

穿皮扎鞵鞋違者罪之

題禁詭異巾服

嘉靖十四年四月內禮部題該提學御史寶一桂題為
禁革詭異冠服以昭聖製以齊風俗事奏詭異巾服自
嘉靖七年三月二十七日特勅禮部分別以其圖說頒
布天下嚴禁異服天下之人風俗丕變無敢為詭異冠
服者夫何邇來有犯禁諭私家慕效製東坡巾著雲履
及各色異樣巾服者其巾或有紵絲羅絹甚至以氈為

之不惟舉人監生生員儒士凡市井屠販一切庸賤之徒間亦戴之此所謂詭異之服也今見輦轂之下縱橫衢路漫無畏忌在京如此在外可知矣乞勅都察院嚴行禁革等因題奉聖旨這本說的是比年冠服詭異已有旨禁革生儒人等乃敢違禁製用好生不畏法度都察院便出榜曉諭但有巾服異樣并製賣的著緝事衙門及五城兵馬即時拿送法司問罪仍通行南京都察院及各處巡按御史一體嚴加禁約該衙門知道欽此

申明官員服色限制

嘉靖十六年三月內禮部題欽遵聖訓慎法制以嚴禁僭肆事該本部欽奉聖旨欽遵之議得在京在外文武官員除本等品級服色及賜者外不許僭分自恣擅用蟒衣飛魚斗牛等項違禁華異服色及大紅紵絲紗羅服惟四品以上官及在京九卿翰林院詹事府春坊司經局尚寶司光祿寺鴻臚寺五品堂上官經筵講官其餘皆穿綠青錦繡遇有吉禮止許穿紅布絨褐其品官

花樣仍照品級公侯駙馬伯麒麟白澤文官一品仙鶴
二品錦雞三品孔雀四品雲鴈五品白鵬六品鷺鷥七
品鸛鷯八品黃鸝九品鶴鶉雜職練鵲風憲獬豸武官
一品二品獅子三品四品虎豹五品熊羆六品七品彪
八品犀牛九品海馬不許混同錦衣衛指揮侍衛者得
穿麒麟服色其餘帶俸及不係侍衛者俱不許僭用其
軍民人等除官應用之家許令織造其私下與不應用
之物不許製造及擅用違禁華異服色若有仍前僭用

者在京聽科道及緝事衙門在外聽巡按等官照依律例參究題奉聖旨是依擬便出榜文嚴加禁約欽此

印制備考

給印

換給印記

凡內外各衙門印信年久篆文平乏不堪用使具奏鑄換候領新印然後以舊印繳

凡司府州縣奏換印記本部積收奏抄或三顆或五顆

類奏其有火盜遺失例該特奏者單題

先年題凡新鑄印記本部置印模簿一扇將鑄完印記
照顚用使存照仍令置南京印模簿一扇候每年終咨
送南京禮部轉行該局收貯備照

凡各處奏繳舊印俱赴通政司驗進其申呈批文并舊
印赴本部投納隨發鑄印局驗封鎖有無完固封印新
印文是否真正中間恐有差人私拆官封盜用情弊

弘治十四年議准在外大小衙門印記年久印面平乏

篆文模糊者方許申知上司驗實具奏鑄換新印其舊印送上司付公差人員繳部仍發鑄印局看驗若印記新降未久捏奏煩擾雖已鑄換仍將申奏官治罪

嘉靖二十九年閏六月湖廣布政司咨批差承差劉啓爵繳送沙湖驛記一顆到司查無該衙門新記封鎖審據本役回稱係通政司經歷司開拆該本部題奉看得近年各處差來繳印人員不遵舊例將舊印混送通政司經歷司自行開拆另封前來以致稽查不便難以防

杜奸弊以後如遇奏繳舊印除奏本經歷司驗收封進外其舊印有混送到司者就便責付本役送部查繳不必先行拆動以防弊端奉聖旨是欽此

請給關防

凡差委官員請給關防本部如查有繳部見在者即題請給發如無見在請乞欽定字樣另行鑄造給發用使凡審錄各項關防俱係內府印綬監經收如遇各部差官取用本司即具手本差司官一員齎赴本監領出給

發如係本司新鑄關防亦差官送本監掛號然後給發
凡各衙門繳進關防本部差司官一員齎赴內府印綬
監收貯

嘉靖二十九年九月該贊理京營軍務兵部左侍郎王
邦瑞題稱欽命贊理經營務原無印信掌管似應比照
各鎮總官掛印及巡撫給與關防事例鑄給關防一顆
以便行事該本部題奉聖旨關防不必用事總於一京
中外不同外面總都官只名總督京營戎政某官不得

名總兵字樣欽此

嘉靖三十五年六月該巡撫應天右僉都御史張景賢
題稱欽降關防篆文係巡撫蘇松等處關防八字要政
作應天等府字面奉聖旨禮部知道欽此本部看得前
事查無舊例蓋順天應天皆為京府輦轂所臨非列郡
可比故累朝欽降關防其巡撫順天地方止云巡撫薊
州等處而無順天等府字樣則應天可以例推臣等不
敢擅擬改給覆題奉聖旨是欽此

嘉靖三十五年六月該南京守備掌中府事撫寧侯朱
岳等奏乞要比照內守備操江衙門事例頒給關防用
使本部查照南京守備廳衙門自設立以來並無鑄給
關防等事例但留都實國家根本重地守備尤地方
責任專官見今東南多做文移旁午軍務所關尤宜專
一所據朱岳等奏請事宜委應鑄造以便行事伏乞欽
定字樣本部鑄給用使等因覆題奉聖旨與做南京守
備關防欽此

奏給印記

嘉靖三十二年五月該裕王府承奉正韓保景王府承奉正党霖俱奏給承奉印信本部查得舊例衡王弘治五年之國十二年該王奏討本府承奉司印信榮王弘治十二年之國十六年該王奏討本府承奉司印信俱該本部覆題鑄給今看得裕王等府承奉正韓保等奏乞印信遵依查照衡府榮府舊例待王之國之後具本題請照例鑄給行使奉聖旨是欽此

嘉靖三十二年十一月該瑞王昌榮安王孫輔國將軍拱樞奏稱臣父鎮國將軍宸濬於嘉靖四年請乞教授蒙准除一員又於嘉靖八年奏討教授印信亦蒙准給今臣父故所有前項印信臣與父職爵不同奏乞鑄換等因奉聖旨禮部知道欽此本部查照瑞昌等府鎮國等將軍教授印信之給先因宸濬亂後宗室數多而弋陽王初屬統攝事未歸一是以題請鑄給今各將軍分附各府管束則一應事務自當屬於分附府分輔導之

官況郡王子孫官職世降輔國將軍以下原無設教授之例印信豈得一槩鑄給所據二府將軍教授印信應并查革及移咨吏部將瑞昌宜春二府教授查有見在行令於原府帶俸聽候改選以後裁革不必推補其印信作速奏繳一應事務照依三十一年題准得奉欽依事理悉聽分管郡王管理并附該府教授承行等因覆題奉聖旨是欽此

造印

造辦各印

凡鑄真人金印在內各衙門銀印在外各布政司都司銀印俱照定例行

一具手本四本差辦事官齎赴內府關領銀兩送赴六科廊鑄造其銀即係內府所差長隨經收

一具手本三本差辦事官齎送內府司禮監稟請內官

一員公同本部委官監督鑄印局官儒匠役鑄造

一合用池匣袂褥絛銷等件咨工部造辦

一合用木炭等項物料劄順天府轉屬於魚碍官銀內
支給買完送部應用仍將支過并餘剩還官銀兩數目
開報戶部知會

一每印一顆合用木炭五百觔烏梅四觔黃蠟一觔松
香二觔硼砂一觔焰砂一觔明礬二觔潞州大貫四個
一金銀分兩數目 欽賜真人金印用金二百五十兩
王府鍍金銀印用銀一百五十兩 內閣銀印用銀
九十兩 征西鎮朔平羗平蠻等將軍銀印九十兩

宗人府五軍都督府銀印用銀一百兩 六部都察院
并在外各都司銀印用銀九十兩 行聖公張真人中
尉留守司并各布政司銀印用銀九十兩 順天府應
天府銀印用銀九十兩

印例

繳印收銷

凡遇王府繳進金印銀印本部先期題知候命下差司
官一員齎赴內府六科廊鑄印長隨轉送內府內承運

庫收銷其各布政司等衙門奏繳銀印亦照例行

一送手本三本二本送司禮監知會一本送承運庫知會

遺失印記

嘉靖二十九年十月該上林苑監佐監丞王弘久等題稱良牧署署丞陳讓被刼賊殺傷搶去印信一節奉聖旨該部知道欽此該本部覆題行查續經勘明題准免究其印信鑄造給發所失舊印尋訪獲日奏繳等因具

題奉聖旨是欽此

牘式備考

奏牘

風憲官寫奏題本

成化二年禮部奏監察御史趙啟言內外風憲等衙門
官出巡行事遇有機密事情及糾劾姦邪自書奏題本
多有不熟韻體不免倩人代筆往往因而泄漏有誤事
機請自今重事仍依韻式寫奏常事從便書寫許用題

本今議得在外衙門宜一體具奏如舊制其京官公差在外者應行事務照例依韻書寫奏本若是緊急密切事恐有泄漏許寫題本務要字畫真楷不許草率從之

題疏稱藩王諱

嘉靖十年楚王榮滅以諸司疏文直書親王名諱殊乖體統乞禁止之下禮部議請自今凡備錄諸王奏疏及所司題奏疏內一切不諱以遵君前臣名之義其諸勘合劄付等項類止許稱爵不得書名報可

王府奏疏稱式

嘉靖十一年禮部奏王府慶賀奏稱累朝皆有體式凡
皇帝表文例稱聖旦奏疏稱萬壽聖節皇太后壓於太
皇太后表文例稱令旦不壓於太皇太后亦稱聖旦奏
疏稱令節今諸王府所奏諸辭徽稱有乖名分請以徽
稱體式申諭諸王以後不許違錯報可

建議章疏體

嘉靖四十四年禮科都給事中辛自修言人臣祇慎而

後朝廷之體尊邇來題奏章疏競為縟艷不惟九重清覽難於徧詳而事體處分反以文晦甚者以伺察為能至以鄙褻醜穢之語載之牘中尤非對君之體乞勅禮部轉行內外百司自後一應章奏須言簡事核務持大體不許仍前瑣屑沉冗如違聽該科參治上深然之乃詔以後章奏俱務簡明質實有如前欺肆者科臣以聞

定表賀疏謝格

隆慶元年南京戶部尚書馬森以陞秩具疏謝上報聞

因命禮部查官員陞遷并一應謝疏當停免者俱酌議遵守至是禮部議在京文武百官凡遇冊立等太禮合進一箋表及聖節正旦冬至等節止於丹殿前致賀一應陞遷賞賜既經面恩或謝者俱不得治本稱謝南京并在外五品以上衙門及各總兵官凡遇三大節進表慶賀俱照常例行或值冊立等大禮例該慶賀者須待本部題允方許撰表齎進其總督撫按俱不得違例進表稱賀南京五府掌印官六部都察院堂上官大理寺

正官及各處總督巡撫官皆係重臣一應陞遷及經論
劾慰留其或軍功受賜邊鎮給賞等項既不得廷謝仍
許具疏三司將佐等官一同受賞者總兵督撫即與併
謝不得另具奏疏其疏務明白簡直不得牽合四六之
體務為浮靡之辭有不遵守者聽本部及該科指實參
奏詔如議行

朝覲即齋進表文

隆慶元年禮部覆都給事中何起鳴奏隆慶二年天下

來朝官即齋進萬壽聖節表文不必別委自從朝覲年
悉遵此例從之

奏疏便省覽

隆慶三年禮部覆給事中王之恒御史趙煥奉請上御
便殿令九卿科道官有大事皆得面奏取自宸斷其疏
中語言字畫務便省覽得旨今後諸司章奏務詞語簡
明字畫楷大如嘉初年式便殿面奏候旨行

表箋

箋文勿用虛詞

洪武元年春正月辛丑上謂中書省臣曰古人祝頌其君皆寓警戒之意邇觀羣下所進箋表頌美之辭過多規戒之言未見殊非古者君臣相告以誠之道今後箋文只令文章平實勿以虛辭為美也

重定進賀表箋儀

洪武十四年重定進賀表箋禮儀凡萬壽聖節正旦冬至在外各衙門先期拜表稱賀至期前一日文武官於

本衙門內齋沐宿歇至日於所在大衙門內會同文武
官具服告天祝壽禮其天壽聖節在外五品以上衙門
止進表文一道正旦冬至加中宮皇太子箋文各一通
王府布政司按察司直隸府州表箋俱差官齋進禮部
在外則州進於府府進於布政司凡五品衙門隸布政
司者亦進於布政司類進禮部各都司及直隸衛所差
官齋進五軍都督府各處守禦指揮使司千戶所進於
都指揮使司差官類進五軍都督府至日禮部以各處

表箋自通類奏啟其表箋文詞不得用駢儷務在典雅
其有御名廟諱依古禮二名不偏諱嫌名不諱凡凶惡
字樣俱用迴避仍以硃筆圈點句讀用黃紙箋紅紙為
函

頒表箋文式

洪武二十九年秋七月頒表箋文式於天下先是天下
諸司所進表箋詞體駢儷上厭之命翰林院學士劉三
吾右春坊右贊善王俊華撰慶賀謝恩表箋成式頒於

天下諸司凡遇慶賀謝恩如式錄進

更改表箋式

宣德元年行在禮部奏洪武中降表箋式於天下中有御名依古二字不偏諱之例今各處錄進或以他字代之不成文理請與翰林院計議更改使天下遵守從之

申明進賀表箋儀

宣德四年令在外慶賀如洪武初舞蹈山呼十四拜凡進賀表自親王各一總兵各一朝鮮國王南京禮部等

衙門一浙江等布政司按察司直隸府州等衙門各一
南京中軍等都督府一中都留守司浙江府都司直隸
衛所等各一

定進表宮例

正統二年定天下諸司進表例先是行在禮科給事中
李性等劾奏山西等處都布按三司等衙門官員不躬
進表請治其罪上姑宥之命禮部議為定例於是尚書
胡濙等請自今惟聖節表令堂上官躬進正旦冬至節

遣首領官及所屬佑貳官代行

查參表箋

凡天下各衙門齋到表箋本部先期行國子監取監生四名參看除土官衙門不究外其餘各衙門表箋中間有違式及污漬漏印錯落字樣并過期不到等項參出送司呈部除將齋到表箋類進隨行參治候命下本部移咨都察院轉行各該巡按御史通行查提到官問擬應得罪名照例發落過期不到表箋通行補進其極邊

地方照例免究開坐題請定奪

嘉靖二十九年九月該福建行都司署都指揮僉事顧
邦重進萬壽表文順帶屯牛文冊該工科參本官奏報
文冊既違限期且入賀大典豈容兼理他務難逃不敬
等因本部覆題合咨送法司問擬應得罪名奉聖旨是
欽此

嘉靖三十二年南京禮部等衙門差大理寺評事張淑
名齋捧元旦表文旦後方進慶賀本奉聖旨這賀本過

期方到禮部參看了來說欽此本部看得評事張淑名
既承差委其原領奏本自合同日赴通政司投進今未
進於元旦之先本進於元旦之後事屬稽違法當參究
合將本官咨送法司問擬應得罪名照例發落以為將
事稽違者之戒覆題奉聖旨張淑名依擬還罰奉兩個
月欽此

進表箋官

嘉靖二十六年九月該陝西巡按御史胡彥奏稱馬政

不修乞免差行太僕苑馬二寺堂上官進表奉聖旨該部看了來說本部查得正德七年二月該遼東苑馬寺卿夏翟奏稱本寺與遼東都司全無干涉而各節賀慶表箋轉附代齋殊非忠敬之意乞要自行差官徑進本部議得該寺既與都司無干其表箋委難類進合無准其所奏通行太僕苑馬寺一體遵守施行等因奉武宗皇帝聖旨依擬行欽此今看得御史胡彥所奏相應議處合候命下本部移咨都察院轉行陝西撫按衙門行

令二寺今後凡遇萬壽聖節表文照舊差堂上官員齋
進如果地方事有各官俱有差占許先期申請撫按衙
門差委該寺首領或所屬官一員代齋仍一面具實奏
行本部以憑查考其堂上官往回亦不許在途遷延及
枉道回籍以致虛曠誤事如違聽巡御史參究奉聖旨
是欽此

揭帖

春坊揭帖

禮部尚書某今將某年某月某日早吏部兵部引奏請
旨事件開列於後

一吏部奏引選大小官員進士人等某人等共若干名
請旨又奏各衙門辦事進士歷事監生共若干箇請旨
又奏考驗過三考役滿吏典若知印及上銀實撥當該
免考吏某人等共若干名請旨

司禮監請選官印子

一兵部奏後面跪的若干名是某等衛所某等官舍內

若干名告替職若干名告襲職又有若干名告優養若干名告優給是幼男婦女見在門外伺候又有若干名此告優養優給在衛所聽候俱有官吏保結明白查照黃選相同於例都該替職襲職優養優給請旨又奏後面跪的若干名是某等衛所某等官他父兄等項患風癰等病俱在原衛令他男弟等項前來替職俱有官吏人等保結是實查照黃選相同緣各官俱年未六十歲查得舊例這等告的果有殘疾也准他替如今他們所

告殘疾是實請旨又奏先以欽准襲職優給官員具奏
附選

司禮監請選官印子

書牘

定書劄式

洪武三年上諭中書省臣曰今日於書劄多稱頓首載
拜百拜皆非實禮其定為儀式令人遵又小民不知
避忌取先聖先賢漢唐國寶等字以為名字宜禁革之

於是禮部定議凡致書於尊者稱端肅奉書答則稱端肅奉覆敵已者稱奉書奉復上之與下稱書寄書答卑幼與尊長則曰家書敬覆尊長與卑幼則云書付某人其名字有天國君臣聖神堯舜禹湯文武周漢晉唐等國號相犯者悉令更之

皇太子與諸王式

洪武十二年六月壬申翰林儒臣議皇太子與諸王書則曰記問答諸王書曰記答諸王奉書皇太子則曰謹

啟上改皇太子與諸王書曰記諭餘從之

文移


諸司文移式

洪武十五年閏二月甲申命禮部定諸司文移式先是
以六部轄各布政使司都察院轄各按察司五軍都督
府轄各都司衛所惟今吾等十二衛指揮使司係親軍
王府長史司及護衛俱無統屬文移未定其式至是定
議六部及親軍諸衛欲移文護衛皆由都督府行於本

國境內都指揮使司轉達若五軍都督府及親軍并在京各衛欲移文長使司者皆由六部行於本國境內布政使司轉達其護衛及長使司中文亦如之其六部及京衛文移在外都指揮使司并直隸衛所由五軍都督府行之五軍都督府於各布政司并直隸府州由六部行之其於按察司皆由都察院行之著為令

洪武十六年七月五軍都督府有事於都察院令經歷司呈院如行六部則經歷司於主事廳互牒其在京秩

三品者與本院平行仍故牒在京四品在外按察司帖
下在京五品以下衙門行移文本院俱稱具呈惟大理
審刑磨勘司與本院經歷司行移各道監察御史止由
本院與諸司無行



禮部志稿卷六十四